

全上古三代秦漢
三國六朝文

北齊後周
隋文先唐
第十函
第十冊

全後周文卷十八

烏程嚴可均校輯

庾信

十一

周譙國公夫人步陸孤氏墓誌銘

夫人諱字本姓陸吳郡人也天子拓境百越來庭丞相勒兵三江
席卷高祖載爲劉義眞長史畱鎮關中旣沒赫連因卽仕魏臨終
誠其子孫曰樂操土風不忘本也言念爾祖無違此心祖政驃騎
大將軍儀同三司恆州刺史父通柱國大將軍大司馬文安公匡
贊經綸參謀揖讓名高廣武功重長平夫人七德含章四星連曜
敬愛天情言容禮典九日登高作銘秋菊三元告始或誦春椒年
十有四娉于譙國友其琴瑟愈恭節儉之心伐其條枚實秉憂勤
之德鄴地登高之錦白濯江波平陽採桑之津躬勞蠶月天和元
年冊拜譙國夫人東武亭之妻旣稱有秩南城侯之婦還聞受封

柱國殿下曰名華分照增城峻土揚旌熨道問政印都白狼之溪
途艱黃牛之版荔枝之山地險葡萄之國夫人別離親戚關河重
阻夷歌一曲未足消憂猿鳴三聲沾衣無己是曰天厲之疾遂成
沈痼玉瀝難開金膏實遠建德元年七月九日薨于成都私第春
秋二十有一卽曰其年十一月二十二日歸葬長安之北原詔贈
譙國夫人禮也殿下傷神秋月掩淚長松周季直之畱書更深冥
漠潘安仁之詞藻徒增哀怨豈直西河女子獨見銀臺東海婦人
先逢金闕銘曰

芟陵反旆椒山止戈金精據嶺昌閣凌波西遊卿相東裂山河華
亭冠冕穀水絃歌震維徙族燕垂從宦塞人飛狐關連鳴雁策預
登阜功參臨澗寶鼎畱銘彫戈餘贊應圖淑令秉禮言歸魚軒馮
軾澤雉文衣明月照鏡仙石支機行雲細起迴雪輕飛北降帝子
南麾蜀守若水旣開靈山已鏤月峽猿啼江神牛鬪星機北轉日

轡西迴陽泉伏氣陰律沈灰鶴辭吳市鳳去秦臺神光離合燈影
徘徊雙流反葬百兩迴旌少女離位夫人去城帷堂野設帳殿郊
營山川奇事風月無情搖落丘隴荒涼封域樹樹秋聲山山寒色
草短逾平松長轉直節墳方固園陵永植

文苑英華九
百六十三

周趙國公夫人紇豆陵氏墓誌銘

夫人諱含生本姓竇扶風平陵人魏其朝議列侯則莫能抗禮安
豐奉圖功臣則咸推上席外戚列傳既聞建武之書仲山古鼎或
表單于之獻祖略少保建昌郡公父熾柱國大將軍太宗伯鄧國
公孟津大誓常預同德之臣咸陽違約克贊先登之主竝得位入
六府功參八柄夫人有文在手有象應圖榮曜夙彰徽華早茂肅
恭已禮受教于公宮言容已德有聞于師氏及乎進賢君子內主
邯鄲琴瑟在堂韜韞是服長久于節不無秋菊之銘履端于始或
有椒花之頌豈止莊姬掩淚楚相知慙定姜問兆齊兵不入武成

二年冊拜趙國公夫人漢王聞立義之婦邑已延鄉齊侯見有禮
之妻封之石窳異代同榮差無慙德柱國殿下居若木之一枝在
天潢之別派揚旌玉壘驅傳銅陵南通向日之民東被無龍之國
夫人從政月峽贊德雲門錦濯江波還臨織室山明石鏡卽對粧
樓旣而玉律頻移金爐不變胡香四兩嗟西域之使稀靈草一枝
恨瓊田之路絕天和五年四月二十二日薨于成都之錦城春秋
二十孫子荆之傷逝怨起秋風潘安仁之悼亡悲深長簟况復仙
臺永別無復簫聲傅母長歸唯畱琴曲七年二月日歸葬于長安
之洪瀆原詔贈趙國夫人禮也雲雨去來旣畱連于楚后光陰離
合實惆悵于陳王銘曰

河西斗絕觀津孤起章武賢臣安豐貴仕木樓千仞金山萬里紹
慶邢姨基昌宋子施衿趙北侍姆秦南紘緹禮數厭狄駢驂義超
江汜仁流葛覃玉筐迎鷓金籠助蠶敬愛純深端莊淑問有光國

史無形喜慍舉案外恭停機下訓馨馥于蘭年華于蕤風雨消散
神靈離絕婺女還星姮娥歸月左楹夕奠高堂朝發空揚凌波更
無迴雪下平曰隰高平曰原西臨冰井北望塞門猶垂雉服尙駕
魚軒平原忽矣天道何言山迴地市路沒滕城松悲鶴去草亂螢
生新雲別起舊月孤明賢墳永式節隴常貞

文苑英華九
百六十三

周安昌公夫人鄭氏墓誌銘

夫人諱某滎陽陽武人也周宣王之母弟俾侯于鄭鄭莊公之重
世卿士于周曰國爲族自茲而始祖瓊太常恭侯父穆司空貞公
西京賦詩奉常參柏梁之宴東都言讖司空爲武衛之官籍連帝
譜旣同盤石門稱同德無廢儒林夫人禮義閨門端莊令淑采采
芣苢萋萋葛覃及乎作配君子言事舅姑下氣怡聲承巾奉帚親
戚惟禮閨闈曰睦保定二年冊拜滎陽郡君序戚升榮從夫有秩
豈惟立義之婦邑曰延鄉有禮之妻封之石窆大將軍沈犀二江

夫人聞猿三峽明月靈關之阻秋風蜀道之難掩曰瑤華先從春
露天和十八年五月二十日薨于成都春秋三十有六詔贈安昌
國夫人禮也卽己其年十一月十六日歸葬于咸陽之白起原遂
使山迴反壤先封節婦之陵日入虞淵實掩賢姬之墓嗚呼哀哉
乃爲銘曰

天河開國分畿置政地有十城人居九命疇昔之邑今茲成姓識
履傳風參與畱慶三星在戶百兩言歸虔恭內政榮曜中闈承姑
奉盥訓子停機桑園蠶績綿室鸞飛珩璜節步藻火文衣巴水幽
咽猿鳴斷絕月落珠傷春枯桂折趙瑟長辭秦簫永別貞姬掩隧
節女封墳洛濱無月荆臺失雲鳥悲傷聽松聲愴聞千年遂古百

代餘芬

文苑英華九
百六十三

周大將軍隴東郡公侯莫陳君夫人竇氏墓誌銘

夫人諱某扶風平陵人也章武開國名高外戚之右安豐入朝位

大五百八十八
小二十

在功臣之上祖曰孝昌之始主諾淮陽父曰正光之初褰帷海岱
夫人生于禮義之門宗于箴誡之德虔恭惟禮令淑惟儀及乎百
兩言歸三屋在戶箴盥始事條枚是則有子從政猶無逸豫之心
有夫出征自識山陵之兆大統十六年冊授永安郡君婦曰夫尊
親由子貴朝章家慶兼而有之保定二年改授隴國夫人車服禮
數袿褕典則有美河魴足光彤史旣而風霜所及灰琯遂侵與善
何言至于大漸天和六年四月七日薨春秋六十有六卽曰其年
十月十日遷葬于咸陽萬年縣之杜原山形起伏旣符白鶴之祥
地勢風煙乃合青烏之氣銘曰

觀津世族平陵豪姓四侯登仕三君從政白狼建功丹蛇襲慶漢
之廣矣先聞淑令君子朝端賢才家政簪珥曰禮軒車曰命讓果
成廉推珠止競百年超忽千金莫恃室謝賢夫庭辭貴子歸鞶輟
露采繫廢祀室委眠蠶衣畱畫雉雲垂下澤日淹高春空帷舊館

虛幕新封山迴廣柳路沒深松遊魂幾變大人何從

文苑英華九百六十三

周冠軍公夫人烏石蘭氏墓誌銘

夫人諱某樂陵人也晉司徒樂陵公苞後子孫就封因卽家焉扶風舊城猶存鐵市河南故墅尙餘金谷或寓燕陲仍仕代郡祖行代郡尹父魏司空蘭陵郡公司空佐命魏朝少傅丞疑周室竝爲大族俱蒙賜姓秦晉匹也是曰通家夫人年十七歸于宇文氏淑令端莊含章貞吉箴盥惟儀閨闈已正某年除金鄉郡君某年改授冠軍夫人四德小君宜其家室三事內主翻辭贊務已保定五年四月遭疾薨時年四十有四卽已其年某月日歸葬于京兆之某原人世風煙山川超忽陵陂青麥儻逢貞女之墳隴首白楊或表賢姬之墓乃爲銘曰

三星麗天五岳鎮地禮有其秩人居其位燕趙多奇山川雄氣挺茲令淑惟此含章玉生庭照蘭開室香邢姨褰服宋子河魴百兩

言歸九儀從聘禴狄七彩軒車六命鼎室辭親槐庭贊政世爲閔
水人成大夢迴帳山門移燈泉洞金甌長含銀蠶永送香填柏榔
路閉松城悲鸞獨影雄劔孤鳴雷連趙瑟悽愴秦笙

文苑英華九百六十三

周太傅鄭國公夫人鄭氏墓誌銘

夫人諱某滎陽開封縣遠里人也七子賦詩足光賓客三卿從政
實靜諸侯驂乘則晉后停輿來朝則漢君識履華胄蟬聯無虛史
籍祖邠秦州別駕父茂伯撫軍將軍涼州刺史伯陽縣侯夫人令
淑早聞芝蘭獨茂既容既德言告言歸悌實溫清恭惟箴盟太傅
弼諧周室股肱攸寄夫人輔佐君子勤勞是司琴瑟既友條枚無
伐故得用之邦國成之孝敬某年月日封鄭國夫人禴狄既加紘
縵是務夫人有安世之貴躬服浣濯子有文伯之尊無忘機杼表
裏惟安閨闈且正醫門有疾藥對無徵天和三年三月二十日薨
葬于長安之石安原世子某兄弟竝勛慈訓咸遵母儀霜露深悲

寒泉增慟銘曰

居德圃田當官教府置騎賓來開黌學聚福履家室賢才踵武棠
棣之華螽斯之羽人倫七德風化二南采采芣苢萋萋葛覃節行
聲玉副笄珈簪柳園秉杼桑津浴蠶春秋超忽零落無時家亡淑
女國喪賢姬香墳永送舞鶴長辭山深月闇風急松悲千年開閉
將驗靈龜

文苑英華九
百六十三

後魏驃騎將軍荊州刺史賀拔夫人元氏墓誌銘

在河之洲聞君子之配德言采其蕨見夫人之有禮用之風化人
倫厚焉夫人諱安字大羅河南洛陽人也祖某京兆康王父昭驃
騎大將軍開府儀同三司錄尚書司州牧汝陽郡王跗萼雄圖階
基霸迹公卿之室將相維家夫人能脩法度無思犯禮恭儉節用
憂在進賢大統五年封樂安公主歸于賀拔氏時年十三思事憂
勤化成婦德彤管載暉棠棣早茂及乎謳歌有歸禴狄降等輔佐

大五百九十六
小二十

君子猶安其室周天和元年乃封章武郡君霜露不居風煙飄忽
邁疾累旬奄捐館舍己周天和四年二月二十六日薨于長安萬
年里春秋五十有二詔贈頓丘國夫人禮也卽己其年三月二十
日歸葬于咸陽之石安原旣異乘鸞翻然永去雖非舞鶴卽掩泉
門欲誌佳城乃爲銘曰

逝矣雄謀悠哉霸轍九服潛運三川中竭卿相連鑣賢才舞絕琬
琰令淑施衿結襦方之棠棣譬己螽斯旣全婦德還稱母儀逝水
滔滔危途冉冉問藥無對蒸丹不驗狄服空陳絃機虛掩郭門路
轉哀挽途窮隴深結霧松高聚風春蘭秋菊唯始唯終

三

文苑英華
九百六十

周大都督陽林伯長孫瑕夫人羅氏墓誌銘

夫人諱某恆州代郡太平縣人祖某父協周大將軍南陽郡公夫
人資于事親躬奉訓誡教于宗室足聞詩禮及乎言歸肅恭如事

蘋藻維敬紘紼是勤內位克諧中閨已睦年齡不競霜露先侵更
無延壽之杯遂闕長生之枕已周天和四年二月八日薨于長安
之洪固鄉時年二十有三其年某月日葬于萬年縣之壽里山非
宋國翻爲節女之陵地異荆臺遂有賢妃之墓銘曰

畢狼建國靈武開都地接天柱山臨寶符人資義烈世襲雄圖葛
覃維萋棠棣早盛既安淑德爰從配命四教弘宣三星克正霜凋
桂苑風落芝田三從闕性五福傷年歸安永絕言告長捐悽切郊
野紆迴隰原風慘雲愁松悲露泣朗月空嗟傷神何及

文苑英華
九百六十

三
周儀同松滋公拓跋兢夫人尉遲氏墓誌銘

夫人諱某河南洛陽人也祖某父太師柱國公魏室喪亂經綸夷
阻周朝建國匡翊揖讓圖謀帝系卽有內外之親分裂山河仍爲
舅甥之國夫人容範端莊儀形淑令六義觀德南風有夫人之詩

八卦成形東方有少女之位外傳習言公宮教業箴盥線纈佩悅
茵蘭年十有二出適儀同拓跋兢衣其翟服既得宗婦之儀乘其
魚軒還從列國之禮標梅三實無闕其時夭桃九華能脩其政某
年某月冊拜迴洛縣君母金明公主魏文帝長女春則帝女採桑
秋則王姬築館夫人出入主家遨遊戚里濯龍園苑長門宮殿既
而膏腴美疾華茂傷年沈痼牀帳蒸離寒暑三世之術無乏于醫
門百草之本途窮于藥性建德三年五月七日亡春秋三十昔西
河女子值九節之菖蒲東海婦人得三山之芝草無由再遇悲矣
如何卽曰其年十一月十五日葬于京兆之北陵原龜筮告辰上
陵啟奠西臨織女之廟南望湘妃之墳嗚呼哀哉乃爲銘曰
父曰帝師母曰王姬車服不繫江漢無思是生令淑觀禮敦詩聲
超宋子德茂邢姨繼世盛德思賢克舉奠雁迎門濡蘋實俎奉盥
如事移茵卽序春水浴蠶秋機秉杼帝鄉近親帝城近臣濯龍親

賦平陽主人金波迴月玉樹臨春弄玉鳳凰昌容紫草自此千年
無人得道舜華榮耀飄零何早渭水北原平陵故園纔通谷口卽
望寒門吁嗟此地去矣歸魂孟冬十月長松九年親賓掩淚悽愴

何言

文苑英華九
百六十三

周驃騎大將軍開府儀同三司冠軍伯柴烈李夫人墓誌銘

夫人諱某隴西狄道人也周有柱史夫子曰之猶龍漢有將軍宛
城曰之輸馬復有西人上書仍爲秦國之相東向問計卽是韓王
之師父宜使持節大將軍南北二華州刺史順陽郡公魏武皇帝
之長舅也穰侯魏冉居咸陽之宮曲陽王根借明光之殿語其貴
戚差足擬倫論其退謙彼多慚德夫人幼而聰敏早聞令淑彤管
有美賢才見稱弄其紙筆懼失諸兄之意翦其鬢齡畏傷王母之
心年十有一出適驃騎大將軍開府儀同柴烈烈曰上將頒朔中
台受任軍國忠勤規模繁總夫人輔佐君子言容匡贊增曜三星

欽明四德授巾沃盥有謹于事姑斷織停機無忘于訓子保定二年冊授大夏縣君既曰夫尊又云子貴乃遷順陽改郡君夫人之邑或用鄉名小君之號多從夫秩典冊光臨足稱榮寵本有風氣之疾頻年增動略多枕臥飛龜之散遣疾無徵畫龍之符畱年不驗曰今建德四年三月日薨于館舍春秋四十九卽曰其年八月日葬于長安之洪瀆原神光離合尙在河湄雲氣徘徊猶歸樓下嗚呼哀哉乃爲銘曰

上書秦相立功漢將隴水分流秦川遙望秋陸俗勇金行地壯廣武軍中安平河上妻者齊也謂嫁曰歸三星夜照百兩朝飛禴狄有典容禮無違台庭等秩侯服同衣子奉母儀夫聞家政七族承和九閨連慶紛悅恭肅溫清孝敬杼秉秋成蠶隨春令年華木落電影先過徒餐日氣空飲天河星凋玉井月拚金波虞淵落日薤露哀歌寂寞虛奠荒涼象設幽隴龜封重泉蟻結秋色悽愴松聲

斷絕百年何幾歸于此別

文苑英華九
百六十三

賜進士出身一品銜廣東等處提刑按察使司按察使兼管驛傳事務黃岡王毓藻校刊

全後周文卷十八終

大三百六十九
小十一